

10 NOV 1999
Parlimen-Bubar
PARLIMEN BUBAR ESOK UNTUK PILIHAN RAYA UMUM

KUALA LUMPUR, 10 Nov (Bernama) -- Parlimen akan dibubarkan esok untuk membolehkan pilihan raya umum ke-10 negara diadakan, demikian Speaker Dewan Rakyat Tun Mohamed Zahir Ismail mengumumkan hari ini.

Zahir membuat pengumuman yang mengejutkan itu pada permulaan sesi petang persidangan Dewan Rakyat selepas waktu makan tengah hari pukul 2.30 petang.

Perdana Menteri Datuk Seri Dr Mahathir Mohamad sebelum ini telah dijadual mengadakan peridangan media di pejabatnya pukul 4 petang hari ini, apabila beliau dijangka mengumumkan pembubaran Parlimen.

Zahir berkata beliau menerima surat daripada Yang di-Pertuan Agong Sultan Salahuddin Abdul Aziz Shah pukul 12.45 tengah hari bagi memberitahu beliau mengenai perkenan diraja bagi pembubaran Parlimen.

Pengumuman pembubaran itu menamatkan spekulasi yang hangat diperkatakan sejak berbulan dahulu bahawa pilihan raya umum akan diadakan pada bila-bila masa, sebelum tamat penggal Parlimen sekarang pada Jun tahun depan.

Spekulasi itu semakin menjadi-jadi malam tadi apabila diumumkan bahawa Dr Mahathir membatalkan jadual lawatannya ke Afrika Selatan untuk menghadiri Mesyuarat Ketua K/Ierajaan Komanwel (CHOGM).

Menurut perlembagaan persekutuan, pilihan raya umum mesti diadakan sekali dalam setiap lima tahun dan dalam tempoh 60 hari selepas Parlimen dibubarkan.

Sebelum pembubaran itu, Timbalan Perdana Menteri Datuk Seri Abdullah Ahmad Badawi telah menghadap Yang di-Pertuan Agong pukul 8.30 pagi.

Setengah jam kemudian Dr Mahathir pula tiba di Istana Negara.

Dr Mahathir, yang juga Pengerusi Barisan Nasional (BN), menghadap Yang di-Pertuan Agong dipercayai untuk memaklumkan tentang keputusannya untuk membubarkan Parlimen dan mengadakan pilihan raya umum.

Seorang pegawai Istana berkata Timbalan Perdana Menteri memberi taklimat kepada Seri Paduka mengenai perkara yang berkaitan dengan mesyuarat mingguan Kabinet hari ini, tugas yang biasanya dilakukan oleh Perdana Menteri sendiri.

Selepas menghadap Seri Paduka, Dr Mahathir dan Abdullah kelihatan meninggalkan Istana Negara dalam sebuah kereta untuk menghadiri mesyuarat Kabinet di Putrajaya.

Selepas mesyuarat Kabinet, Perdana Menteri mengadakan perjumpaan dengan para menteri besar dan ketua menteri.

Dr Mahathir juga dijadual mengadakan mesyuarat dengan pemimpin parti komponen BN pukul 3 petang, sejurus sebelum mengadakan persidangan berita pada 4 petang.

BN merangkumi 14 parti komponen terdiri daripada Umno, MCA, MIC, Gerakan dan PPP di Semenanjung; Parti Liberal Demokratik, Akar Bersatu, Pertubuhan Pasokmomogun Kadazandusun Bersatu, Parti Bersatu Rakyat Sabah dan Parti Maju Sabah di Sabah, dan; Parti Pesaka Bumiputera Bersatu, Parti Rakyat Bersatu Sarawak, Parti Bansa Dayak Sarawak dan Parti Kebangsaan Sarawak di Sarawak.

Menurut Suruhanjaya Pilihan Raya (SPR), sejumlah 9.7 juta pengundi berdaftar layak mengundi pada pilihan raya umum akan datang.

Pilihan raya umum yang lepas diadakan pada 24 dan 25 April, 1995 dengan jumlah pengundi yang lebih sedikit sembilan juta orang dalam daftar pemilih.

Yang menjadi rebutan ialah 193 kerusi Parlimen, meningkat satu kerusi

daripada jumlah pada pilihan raya 1995 ekoran pertambahan kawasan Mambong di Sarawak, dan 394 kerusi dewan undangan negeri di Semenanjung.

Pilihan raya bagi Dewan Undangan Negeri Sarawak dan Sabah diadakan berasingan. Pilihan raya negeri Sabah diadakan pada Mac tahun ini manakala bagi Sarawak ia hanya perlu diadakan tahun depan.

Pada pilihan raya umum 1995, BN memperolehi kemenangan besar dengan majoriti empat per lima daripada 162 kerusi Parlimen manakala pembangkang mendapat 30 kerusi.

Pada peringkat negeri, BN memenangi 338 kerusi manakala pembangkang 56 kerusi.

Keputusan pilihan raya 1995 menunjukkan Umno memenangi 89 kerusi Parlimen, MCA (30), MIC (tujuh), Gerakan (tujuh), PBB (10), PBDS (lima), SNAP (tiga), SUPP (tujuh), SAPP (dua), LDP (satu) dan seorang calon BN secara langsung dari Sarawak yang tidak mewakili mana-mana parti komponen BN.

Bagi pembangkang, pilihan raya 1995 menyaksikan DAP memperolehi jumlah kerusi Parlimen yang terbanyak dengan sembilan kerusi, diikuti oleh PAS (tujuh), Parti Melayu Semangat 46 (enam), dan PBS (lapan).

Pada peringkat negeri, keputusan pada 1995 menunjukkan Umno memperolehi 230 kerusi, MCA (70), MIC (15) dan Gerakan (23).

Daripada 56 kerusi pembangkang pada pilihan raya 1995 ialah PAS (33), S46 (12), dan DAP (11)

Sehingga ini jumlah kerusi Parlimen yang dipegang oleh BN telah meningkat daripada 162 kepada 166, antaranya ekoran kemasukan anggota daripada pembangkang.

BN telah juga menambah jumlah kerusi dewan undangan negerinya daripada 338 kepada 349 sehingga ini, sebilangan besarnya daripada bekas anggota S46 yang menyertai Umno ekoran pembubaran parti itu.

-- BERNAMA

AU ES RYN NMO